

दिनांक 25.03.2024
समय: 18.50 बजे

आकाशवाणी जयपुर-अजमेर

प्रादेशिक समाचार।

- प्रदेश मांय लोकसभा चुणाव रा पैला चरण रा नामपाना भरण मांय फगत दो दिन रो बगत रह्यो-कांग्रेस चार और उम्मीदवारां रो ऐलाण कर्यो।
- राज्य मांय आदर्श आचार संहिता री खिलाफवर्जी ने ले र सी-विजिल एप माथे सत्रह सौ शिकायतां-600 रो व्हयो निपटारो।
- प्रदेशभर मांय रंगां रा त्यौहार होळी रो उमाव-मिंदरा मांय व्ह्या फूलडोल उत्सव।

अर

- प्रदेश मांय बधयो गर्मी रो असर-घणकरा जिलां मांय दिन रो तापमान पैतीस डिग्री सेल्सियस रे आरे सारे।

000

प्रदेश मांय लोकसभा चुनाव रा पैला चरण मांय होवण वाळा वोट सारू नाम पाना भरण रो बगत दो दिन रो रह्यो है। नाम पाना भरण री आखिरी दिन 27 मार्च है। पैला चरण मांय जयपुर समेत 12 चुणाव हलकां मांय 19 अप्रैल ने वोट पडेला, अजै ताई फगत 10 नाम पाना ही भरी ज्या है। आं मांय जयपुर मांय तीन, जयपुर ग्रामीण मांय 2, झुंझुनू, सीकर, बीकानेर, गंगानगर अर दौसा लोकसभा हलकां मांय एक-एक नाम पानो भरी ज्यो है। भाजपा अर कांग्रेस पार्टी कानी ऊं किणी नेता आप रो नाम पानो नी भर्यो है। काले दीतवार अर आज धुलंडी री छुट्टी रे पछे नाम पाना भरण सारू दो दिन रो बगत रह्यो है। कांग्रेस पार्टी आज पांच और उम्मीदवारां रा नामां रे साथे छठी सूची कडी है। इण मांय राजस्थान ऊं पार्टी रा चार उम्मीदवारं भेळा है। पार्टी अजमेर ऊं रामचन्द्र चौधरी, राजसमंद ऊं सुदर्शन रावत, भीलवाडा ऊं डॉ. दामोदर गुर्जर अर कोटा ऊं प्रहलाद गुजंल ने उम्मीदवार ऐलाण कर्या है। इण ऊं पैला भारतीय जनता पार्टी काले देर सिंज्या प्रदेश री सात और सीटां माथे आप रा उम्मीदवार ऐलाण कर्या हा। आ मांय श्रीगंगानगर ऊं प्रियंका बालन, झुंझुनू ऊं शुभकरण चौधरी, अजमेर ऊं भागीरथ चौधरी, जयपुर शहर ऊं मंजू शर्मा, जयपुर ग्रामीण ऊं राव राजेंद्र सिंह टोंक-सवाईमाधोपुर ऊं सुखबीर सिंह जौनापुरिया अर

राजसमंद मांय महिमा विश्वेश्वर सिंह ने मौको दीरीज्यो है। इण ऊं पैला भाजपा राज्य री पन्द्रह लोकसभा सीटां माथे उम्मीदवार ऐलाण कर दिया हा। इस तरह पार्टी, राज्य री 25 मांय ऊं 22 सीटां माथे उम्मीदवार ऐलाण कर चुकी है। वठे ई कांग्रेस पार्टी जयपुर शहर सीट ऊं आप रा ऐलाण उम्मीदवार सुनील शर्मा ने बदल ने उण री ठौड़ पैली रा मंत्री प्रताप सिंह खाचरियावास ने मैदान मांय उतार्या है। दूजी कानी कांग्रेस प्रदेश मांय अजै ताई 21 सीटां माथे उम्मीदवार उतार्या है। पार्टी सीकर लोकसभा सीट ने सहयोगी मार्क्सवादी कम्युनिस्ट पार्टी अर नागौर सीट ने राष्ट्रीय लोकतांत्रिक पार्टी सारू छोड़ दिया है। माकपा सीकर ऊं अमराराम ने अर रालोपा नागौर ऊं हनुमान बेनीवाल ने आप रो उम्मीदवार ऐलाण कर्या है। ध्यान जोग है के राज्य मांय दूजा चरण मांय 13 लोकसभा सीटां सारू 26 अप्रैल ने वोट पडेला। इण री अधिसूचना 28 मार्च ने काडी जायेला। लोकसभा चुनाव री मतगणना चार जून ने व्हेला।

000

चुनाव आयोग, आवता चुनावे रे दौरान पर्यावरण ने देखता अनुकूल चुनाव प्रक्रिया ने बधावो दे रियो है। आयोग चुनाव मशीनरी अर राजनीतिक दलां ने मतदाता सूची अर चुनावी सामग्री सारू कागज ने कम ऊं कम काम मांय लेवण रा निर्देश दिया है। आयोग दलां अर चुनाव काम मांय लाग्या महकमां ऊं ई-बुक्स अर ई-डॉक्यूमेंट्स ने बत्ती ऊं बत्ती काम मांय लेवण ने कह्यो है अर डबल-साइड प्रिंटिंग अर लेआउट मुजब तैय करण रा निर्देश दिया है।

000

प्रदेश मांय आदर्श आचार संहिता री खिलाफत माथे निगे राखण सारू चुनाव आयोग रो सी-विजिल ऐप कारगर साबित व्हे रह्यो है। ऐप माथे अजै ताई कोई सत्रह सौ शिकायतां दर्ज करी ज्यी है, आ मांय ऊं कोई छः सौ रो निपटारो कर दीरीज्यो है। मुख्य चुनाव अहलकार प्रवीण गुप्ता बतायो के ऐप री मार्फत 19 मिनिट रा औसत बगत मांय शिकायतां रो निपटारो व्हे रह्यो है। राज्य मांय सब ऊं बत्ती 2 सौ 65 शिकायतां टोंक जिला ऊं मिली है। शिकायतां मांय गैर कानूनी पोस्टर अर बैनरां री शिकायतां सब ऊं बत्ती है। ध्यानजोग है के सी-विजिल ऐप, आम लोगां ने आदर्श आचार संहिता री खिलाफत री सूचना चुनाव आयोग ने देवण रो हक देवे है।

000

लोकसभा चुनाव मांय वोट देवण बाबत् जाग जगावण सारू आकाशवाणी समाचार जयपुर री ओर ऊं संदेश श्रृंखला चलायी जा रही है। आप संदेश रिकॉर्ड कर र या टाइप कर र म्हाणा व्हाट्सअप नम्बर 94140-52368 माथे भेज सको हो। चुणी ज्या संदेश म्हाणा न्यारा-न्यारा समाचार बुलेटिन मांय भेळा कर्या जावेला।

000

होळी रो त्यौहार आज प्रदेशभर मांय हरक अर उमाव रे साथे मनायो जावे। दिन उगण रे साथे ई नौजवाना अर टाबरां री टोलियां घर रे बारे निकळी अर एक-दूजा रे गुलाल लगा र होळी री शुभकामनावां दी। देर सिंज्या तांई गुलाल अर अबीर ऊं रंगिज्या लोग एक दूजा रे रे साथे होळी खेलता निजर आया। प्रदेश रा न्यारा-न्यारा अंचलां मांय ई रीत मुजब होळी खेळी ज्यी। केई ठौड़ां लोग फाग रा गीता माथे झुमता निजर आया, तो कठे ई रीत मुजब फाग उत्सव मनायी ज्या। मिंदरा मांय ई भगवान रे साथे भक्तां फूल अर गुलाल ऊं होळी खेली। नाथद्वारा रा श्रीनाथ जी मिंदर मांय फूलडोल उत्सव मांय घणी तादात मांय सिरधालू भेळा व्ह्या और ब्यौरो म्हारां खबरनवीस ऊं-

शाहपुरा जिला मुख्यालय माथे रामस्नेही संप्रदाय री खास पीठ रामनिवास धाम मांय होळी मंगळावण रे साथे ई सालाना फूलडोल महोत्सव री शुरूआत व्ही। 30 मार्च तांई चालण वाळा महोत्सव रे पैले दिन आज शोभायात्रा निकाळी ज्यी। महोत्सव मांय हिस्सो लेवण घणी तादाद मांय रामस्नेही संप्रदाय ऊं जुड्या अनुयायी पहुंच रिया है। चित्तौडगढ रा सांवलिया जी मिंदर मांय ई फूलडोल महोत्सव व्ह्यो। करौली रा मदन मोहन जी मिंदर मांय होळी रे मौके घणी तादाद मांय सिरधालू दर्शन कर्या।

जयपुर रा गोविन्ददेव जी मिंदर समेत सगळा छोटा-मोटा कृष्ण मिन्दरां मांय होळी रा खास आयोजन राख्यी ज्या। डूंगरपुर मांय संवारा लोग होळी रा धधकतां अंगारा माथे चाल्या अर सुख शांति री कामना करी। वठे ई बांसवाड़ा मांय बळ-बळती लकड़ियां ऊं राड खेली ज्यी। ईणी तरह दौसा मांय फाग गीत गा रीत निभाई ज्यी। बाडमेर रा सनावडा मांय गैर मेळो भरी ज्यो। शेखावाटी हलका रा जिला मांय होळी माथे ढफ चंग री थाप माथे लोग मस्ती मांय चूर निजर आया। केई ठौड़ां भेळो गींदड नांच अर गैर रा आयोजन व्ह्या। लोगां रे साथे ई विदेशी सैलाणी ई होळी री मस्ती मांय भरी ज्या निजर आया। सवाई-माधोपुर रा रणथंभौर रोड़ रा होटलां मांय देसी विदेशी सैलाणियां होळी रा रंगा अर नाच गाणा रो आनंद लियो। जयपुर अर पुष्कर मांय सैलाणी महकमां काणी ऊं महोत्सव रखी ज्यो। म्हारा अजमेर खबरनवीस बतायो के पुष्कर मांय होळी खेलण फ्रांस, इजराइल, स्पेन, अर इटली, समेत केई देशां घणी तादाद मांय पावणा पूग्यां।

होळी माथे हुड़दंगबाजी रोकण सारू पुलिस रा जवानां संवारा ऊं सावचेती बणायी राख्यी। वठे ई मुख्यमंत्री भजनलाल शर्मा ओटीएस मांय मुख्यमंत्री रहवास माथे होळी मनायी। ई दौरान श्री शर्मा रे आम लोगां गुलाल लगायी। मुख्यमंत्री आपणी जोडायत रे सागे होळी रा गीतां माथे थिरक्या। राज्य सरकार रा केई मंत्री अर विधायकां ई आप रा समर्थनीयां रे साथे होळी खेली।
आज ऊं 16 दिन तांई चालण वाळा गणगौर पूजन री सरूआत ही व्हे ग्यी है।

000

मध्यप्रदेश रा उज्जैन रा महाकालेश्वर मिंदर रा गर्भ गृह मांय आज संवारा आग लाग ग्यी। ओ हादसो भस्म आरती रे दौरान व्ह्यो। हादसां मांय मिंदर रा पुजारी समेत 14 लोग घायल व्ह्या है। घायलां ने इन्दौर अर उज्जैन रा अस्पतालां मांय भर्ती करायी

ज्या है। प्रधानमंत्री नरेंद्र मोदी हादसा माथे दुख जतावता सगळा सिरधालूआं रे बेगा ठीक होवण री कामना करी है।

000

मार्च मीना रा उतार रे साथे ई प्रदेश मांय गर्मी रो असर बधण लाग्यो है। मौसम मेहकमां मुजब आज घणकरां जिलां मांय दिन रो तापमान 35 डिग्री रे आरे-सारे बण्यो रह्यो। मेहकमो 27 मार्च ऊं बीकानेर संभाग मांय कटे-कटे ई हल्की बिरखा री आस आस जतायी है। इण रे पछे राज्य रा आथूणी जिलां मांय दिन रो तापमान 40 डिग्री तांई पूगण री आस है। ई बीचे एक कमजोर विक्षोभ रा असर ऊं जयपुर संभाग मांय ई कटे ई-कटे ई हल्की बिरखा व्हे सके। वठे ई मीना रा आखिर मांय एक और हलका विक्षोभ रो थोडो असर व्हे सके है।

घरेलू दवा कंपनी भारत बॉयोटेक इंटरनेशनल लिमिटेड टीबी रा टीका-एमटीबी वैक रो बडी उम्र वाळां माथे मेडिकल परीक्षण सरू कर दियो है। भारत बॉयोटेक मुजब टीबी रो ओ पैलो टीको है जिण ने स्पेन री दवा बणावण वाळी कंपनी-बॉयोफेब्री मानव स्रोत ऊं तैयारी करी है। जांच रे पैला चरण मांय ओ टीको एचआईवी बीमारी रे बिना वाळा लोगां रे लगायी ज्या है। दूजा चरण मांय ओ टीको एचआईबी रा मरीजा रा लोगां रे लगाया जावे।

000